



Autas premias e blera color blaua

Il victur survegn ina premia da 48 000 francs e per signar las pistas dovrì 1000 liters color.

2



Ovras da Zervreila ston pajar dapli

La dretgira federala ha curregi ina decisiun a favur da las organizziuns da l'ambient.

5

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Cadi: Fa l'iniziativa da fusiun naufragi?

■ (anr/hh) L'iniziativa «Lantschar contractivas da fusiun ella Cadi» para da far naufragi. Suenter che las autoritads communalas da Tujetsch proponan in na alla radunonza communal vegn uss il medem tenor da Sumvitg. La suprastanza communal da Sumvitg ei numnadamein sefatschentada il mardis vargau dall'iniziativa. Alla radunonza communal propona ella da refusar quella. Venderdis decida il cussegl da vischnaunca da Mustér davart la proposta dalla suprastanza communal d'acceptar l'iniziativa. Il president communal Robert Cajacob quenta cun in gie: «Nus essan la vischnaunca el miez e lein mussar la bunaveglia da menar las contractivas.» L'iniziativa «Lantschar contractivas da fusiun ella Cadi» ei vegnida inoltrada allas tschun vischnauncas il december vargau. Tut en tut han 925 persunas suttascrit ella. En tuttas vischnauncas eis ei reussiu da recaltgar il diember necessari da suttascrizziuns.

> PAGINA 5

Martin Gabriel è il nov secretari general da la Lia Rumantscha

■ (cp) La suprastanza da la Lia Rumantscha (LR) ha elegi Martin Gabriel sco nov secretari general da la LR. Martin Gabriel, oriund da Vuorz e sesent a Glion, entra en uffiz il fanadur 2017. Cun questa elecziun dat la suprastanza da la LR in signal per cuntinuitad cun in nov secretari general che enconuscha fitg bain il moviment rumantsch e ch'è avert per novas sfidas.

La suprastanza da la LR, presidiada da Johannes Flury, è satisfatga da pudair preschentar cun Martin Gabriel in nov chau operativ che ha l'intenziun da cuntinuar la via che la LR ha enchainà ils davos onns. Gabriel ha l'experientscha necessaria per manar in'operativa ed enconuscha fitg bain la situaziun linguistica, sociala e politica en il Grischun ed en Svizra.

Martin Gabriel (*1962), burgais da Vuorz, è stà dal 2006 fin il 2013 scrivant da la citad da Glion. Dapi l'onn 2014 è el il manader da la chanzlia e scrivant da la nova vischnanca Ilanz/Glion. Il



Martin Gabriel è il nov secretari general da la Lia Rumantscha.

nov elegi secretari general da la LR ha ina vasta e profunda enconuschientscha dal moviment rumantsch. Gabriel è stà commember da la suprastanza da la Renania dal 1991 fin il 1997 ed è s'engaschà en la cumissiun «Fatscha da nos vitgs» e per l'Uniu da giuventetgna da la Renania. Ils davos onns ha el ultra da quai occupà plirs uffizis accessorics per la lingua, la cultura e la scola. Dapi l'onn 2014 è Gabriel president da la Fundaziun Agentura da novitads rumantscha anr. Ad in vast public è Gabriel enconuschent pervia da ses engaschi tar il Radio Rumantsch, nua ch'el ha lavurà durant 18 onns per differentas redacziuns e sco correspondent en Surselva.

Il november da l'onn passà aveva il secretari general actual Urs Cadruwi demissiunà per la fin da matg 2017. Il fanadur 2017 surpiglia Gabriel la direcziun da l'operativa da la Lia Rumantscha cun actualmain 20 collavoraturas e collavoraturers en radund 13 piazzas cumplainas.

■ COMMENTARI

Il cuolm ha parturiu ina miur

DA MARTIN CABALZAR

En ina nova lescha da cultura, postulada dapi onns da pliras varts, han acturs ed exponents dalla cultura tschentau grondas speronzas. Suenter la debatta monstrusa da treis dis el cussegl grond astgassen biars esser trumpai. Bein han prest tut ils orators puntuau la gronda muntada dalla cultura el cantun Grischun e ludau las prestaziuns culturalas multifaras sin ault nivel. Cu ei settractava denton da metter carn vid l'ossa ein ils parlamentaris semussai sco vegetaris. Senza ina dotaziun finanziaria substanziala ei igl entir exercezi sedegradaus ad ina declamaziun senza effect concret.

Gia la proposta dil departament, respectiv il messadi dalla regenza, ei buca gest stau in act da curascha e d'innovaziun. Il messadi se-restrrenscha sin quei ch'il dretg federal prescriba (scolas da musica) ni ch'incumbensas parlamentaras (Montaltia e Claus) pretendan. Il departament ha munchentau da presentar in inventari surveseivel da quei che vegn prestau e dil potenzial che fuss aunc avon maun. In concept strategic bein documentau vess probabel levgiau da far guotas cun tgau. Deplorablamein han ins denton preferiu il proceder cuntrari: gl'empre la lescha e per lu il concept.

Ella debatta han ins era esentiu trasatras ina certa disfidanza ton enviers la regenza, il departament da cultura sco era enviers ils acturs culturals. Cun la proposta ominusa da surdar la responsabladad per la scola da musica, pils museums regionalis e per la tgira dils beims culturals allas vischnauncas enstagl alla regiun ha il cussegl schizun fatg in fatal pass anavos. Enstagl da soluziuns regionalas cumprovadas drova ei uss contracts singuls cun tut las vischnauncas. Cun renviar il credit d'impegn vegn impediù ina planisaziun a liunga vesta. La nova lescha da cultura ei pia daveras negina bravura.

martin.cabalzar@somedia.ch

Agid direct da Laax pil Nepal

■ (anr/abc) Digl october tochen la fin da december ha la scolasta superiura Nicole Heizmann da Laax priu congedi. Cun sia collega Anja Demont, tgirunza diplomada da Vella, eis ella viaggiada el Nepal. Igl entir menaschi dalla Scolaviva da Laax ei staus inclus el project. Tut ils affons, naven dalla scoletta tochen tiel scalem superiur, ein stai motivai da

lulvar per la caussa speciala. Il comite ch'ei seformaus aposta per organisar il marcau havess ualvess spitgau ina bilanza aschi positiva. Il marcau d'advent dalla Scolaviva da Laax ha purtau in gudogn da 6420 francs. Igl entir recav dall'acziun ei ius cumpleinamein el Nepal.

> PAGINA 6

Trumpada per ils acturs culturals

■ (mc) Il Grischun ha ina nova lescha per promover la cultura. Il giavisch d'artistas e d'artists per dapli sustegn finanziel garanti sur plirs onns n'è dentant betg vegni adempeli. Er en l'avegnir vegn la finanziaziun reglada en il budget. La dumonda centrala che ha probablmain interessà il pli fitg ils exponents da la cultura è stada schebain i dat dapli daners da promoziun en furma dad in credit d'impegn per plirs onns. Dentant quella du-

monda han las deputadas ed ils deputads dal cussegl grond negà. Els han decidì cun 61 cunter 49 vuschs ch'il cussegl grond tractia credits be en il rom dal budget. E cunquai ch'il credit n'è betg vegni acceptà han lura er la pld e la pbd dà en la votaziun finala sustegn a la lescha revedida. Fiss quai i or auter, avevan ils presidents da las fracziuns anc detg ch'els na sappian betg garantir ch'els possian sustegnair la lescha. Per la pps na saja la lescha betg acceptabla

uschia sco ella è vegnida tractada. Per la pps haja la cultura memia blier sustegn cumpareglià cun autras spartas sco la scolaziun ubain la sanadad. Exact il cuntrari di la ps. I na saja sa midà quasi nagut cun la nova lescha – la cultura survegna anc adina memia pauc sustegn. Dentant perquai che museums sajan ussa vegnids resguardads sustegn la ps tuttina la votaziun finala.

> COMMENTARI E PAGINA 3

Üna gita virtuala tras la baselgia claustrala

■ (anr/afi) Daspö cuort temp pon ils interessats admirar las pittüras carolingas e romanas illa baselgia da la clostra Son Jon a Müstair in fond üna gita virtuala. Da l'on 1969 es gnüda constituida la Fundaziun Pro Clostra Son Jon cun l'intent d'accompagnar las lavuors da renovaziun da la clostra. Ün'incumbenza da quista fundaziun es eir da render cuntschainta la clostra e si'importanza culturala. Per pudair sün tuot il muond visitar la baselgia claustrala da Müstair ha realisà la Sphera3D üna gita virtuala tras quistas localitats.

> PAGINA 9

Purtrets cun palperi e forsk a Sent

■ (anr/afi) Daspö il prüim cuors cha Dora Erny ha frequentà es ella fascinada da la tecnica dal tagl da forsk. Cun palperi alb e nair ed üna forsk fuorma ella purtrets filigrans chi muossan cuntradas, tradiziuns, üsansas o situaziuns da la vita dal minchadi. «Plü bod d'eira quista paschiun recreaziun e meditaziun da mia lavur sco hoteliera», disch Dora Erny. Insebel cun sia famiglia abita ella daspö passa 20 ons a Sent. Tuot tenor la grondezza dal purtret resta ella fin a 40 uras vi d'üna singula ouvra.

> PAGINA 9



Nagin credit d'impegn sur plirs onns per la promoziun da la cultura.

RTR